

يوميات راجل مفروس

© حقوق الطبع محفوظة

اسم الكتاب: يوميات راجل مفروس
تأليف: م. حسام الدين محمد مدبولي
تصميم داخلي: سالم عبدالمعز سواح
الناشر: دار الزيات للنشر والتوزيع
القطوع: 21X14
سنة النشر: 2025

تم الإيداع بدار الكتب والوثائق المصرية برقم: 2025 / 30712

الترقيم الدولي (ISBN): 7 - 677 - 844 - 977 - 978



دار الزيات للنشر والتوزيع

المشهرة قانوناً بسجل تجاري رقم / ٤٩٣٥١

ت: ٠١٠٦٦٧٣٦٧٦٥ - ٠١٠١٥٧٦٦٠١٤ / shahnda71@gmail.com

ISBN 978-977-844-677-7



9

789778

446777

يوميات راجل مفروس

تأليف

م. حسام الدين محمد مديبولي

التعريف بالكاتب

- ❖ م . حسام الدين محمد مدبولي .
- ❖ كاتب في جريدة وكالة أنباء مصر .
- ❖ عضو في المجلس العربي للصحافة والإعلام .
- ❖ مؤلفاته

(١) كتاب (نصف ساعة مع سيرة المصطفى)، بأربع لغات في كتابٍ واحد: الإنجليزية، الفرنسية، - الألمانية، العربية.

(٢) مؤلف كتاب (للمتزوجين فقط) ساخر جداً-الطبعة الرابعة.

٣) كتاب (الفخ) أدب ساحر-الطبعة الرابعة.

٤) كتاب (عيادة الباشمهندس) أدب ساحر-الطبعة الرابعة.

٥) كاتب ساحر & غواص في النفس البشرية.

- **TikTok & YouTube: hossamel**
- **<http://facebook.com/HossamAuthor>**
- **<http://tiktok.com/@hossamel56>**
- **<http://youtube.com/@hossamel1300>**

مقدمة الكتاب

٤ ٣

أنا مش فيلسوف ولا حكيم،

أنا مجرد راجل مفروس،

الفرق بيني وبين المجنون بسيط؛

هو ساب الدنيا وارتاح،

وأنا لسه مصرش أفهمها.

الكتاب ده مش دليل سعادة، ولا وصفة زواج ناجح، ولا حتى

محاولة لفهم الستات؛

لأن ده مشروع قومي فاشل من الأساس

ده مجرد مرآة صغيرة للحياة، بس المرآة هنا بتضحك، وبتكشف
وش الحقيقة اللي إحنا بنحاول نغطيه بخفة دم.

في الصفحات دي هتلاقي نفسك، هتضحك على وجعك، وتفرح
على يومك كأنه مشهد من فيلم كوميدي واقعي جدًا، بطولتك أنت
وهتكتشف إن الضحك مش خفة دم، ولا سخرية على الفاضي،

ده أسلوب راقٍ للاحتجاج على الحياة،

أنا بكتب مش علشان أهرب من

الواقع، لكن علشان أفهمه وأنا بضحك عليه،

علشان أثبت إن المفروس مش غاضب،

المفروس واعي زيادة عن اللزوم،

ولو ضحكت وانت بتقرأ، يبقى مش لأن الكلام مضحك، لكن
لأنك عارف إن اللي بيتقال، حقيقي أوي
فأهلاً بك في "يومياتي في عالم المفارقات والعلاقات".



(هرمون النكد، هل يتولد معنا ولا

مكتسب؟)

عجز الحكيم عن تحديد سبب النكد: هل هو هرمون أم أنه في الدم؟ وما الفرق بين هرمون نكد الحياة الزوجية وأي نكد آخر تحت أيّ مُسمّى؟ ولكن ما توصل إليه الحكيم أن النكد أنواع، منها: نكد المدير، ونكد المنزل، ونكد المتزوجين، ونكد غير معلوم.

وكانت المفارقة بين نكد المنزل ونكد المتزوجين في المنزل قد يتولد فيه طاقة سلبية تدمر كل من يعيشون فيه، وبالبحث عن سبب هذه الطاقة غالباً يكون من أصحاب المنزل نفسه، ولكن هنا الحكيم بطبيعته الساخرة سيتحدّث عن النكد الزوجي؛ لأنه ميوّس منه، ومعظم الأطباء فشلوا في تمريره في "القائمة" للزوجة، وهل هو على العريس في الجهاز ولا على العروسة مع الأباجورات، وقد يكون هدية من والدة العريس، أو من والدة العروس، ولكن ما استقر عليه العلماء أنه من ضمن تأسيس الحياة الزوجية أن عدم وجوده يؤدي إلى انهيار العلاقة بين الزوجين، وهو مؤثّر في حياتهما كالماء والهواء، وأن مرور يوم من غير رؤياك (النكد) ما يتحسبش من

عمري معك، وقد فسّر كثيرون أسبابه: هل هو يتولد معنا ولا مكتسب؟ وهل يمكن تجويده أم أنه روتيني مُمل؟

وتبيّن بعد إجراء تجارب كثيرة على الزوجين مع بعضهما، وكل واحد منهما منفرداً، أن النكد الزوجي يتطور بسرعة رهيبية، ويتحوّر لفيروسات شرسة تهاجم في أيام الإجازات والأعياد وجميع المناسبات السعيدة، وليس له أعراض، فهو يحترق ويستمر ويتوغّل، ثم يتحوّل من القلب إلى الصدر، ثم إلى اللسان، وأحياناً للجوارح، ومنها ما يدافع حتى حد الانهيار، وهذا الحد يختلف من شخصٍ لآخر.

وحاول العلماء مع الحكيم معرفة مين السبب في النكد: القلب أم العين، هل الزوجة -لا سمح الله - أم الزوج ربنا يأخذه، وبعد فحوصات وتحاليل تبين أن السبب والمسئول عن النكد الزوجي هو (المأذون) الذي جرى البحث عنه منذ الخليقة، لكن الزوجة ملاك مبتسم يرفرف كالفراشة، والزوج ربنا يولّع فيه طفل وديع صغير، فأين النكد بينهما؟

وسر نجاح النكد الزوجي أنه يبادر وينقض باقتراس شرس لا تتوقعه، ويصاحبه خفقان ورعشة وضربات قلب غير منتظمة، وقد يؤدي إلى الوفاة بحاجات بسيطة، زي: جلطة، أو ذبحة، أو شلل، فلا يرهقك في أعراض لا تعرفها، وكيفية علاجها، والبحث بين الأطباء، ومصاريف علاج وأدوية؛ فهو غير مُكَلَّف. وعند فصل كل طرف من الزوجين على حده، وإجراء التجارب عليه، كانت المفاجأة: نعم مازال النكد موجود عند أحد الطرفين، مما أثار دهشة المحللين: هل النكد هرمون مستقل أم أنه مرتبط بعد الزواج وغير اسمه إلى (النكد الزوجي)؟!

فسَّرت التجارب أن النكد موجود كطبيعة أصيلة في تكوين شخصية أحدهما أو كلاهما، وأن النكد الزوجي ما هو إلا احترام براءة في استخدامه وتطويره داخل الجسد لينمو ويتعرَّع، وهنا أصبح السؤال: هل هناك تحاليل وفحوصات للنكد قبل الزواج، ومعرفة نسبته؟ وهل قابل للتحوُّر والتطوُّر أم سيضمحل بعد الزواج؟



الحياة في الخطوبة حمادة وبعدها شاهيناز، لماذا لا تظل حمادة؟

لقد آن الأوان أن أكتبَ رؤيتي،

نعم، وربما ليس في مقالٍ واحد، ورؤيتي هذه ممكن تكون نظرة، ليست كلها ممارسة فعلية، سأنشر ردي لأحد المنشورات، كانت تتحدّث عن الحب والزواج، وقد رأيت الصراعات في الفيس ووسائل التواصل والإعلام، هناك أسبابٌ أراها، ولكن لي أسلوباً في العرض.

نبدأ، بسم الله الرحمن الرحيم .

سأتكلّم بمنتهى الصراحة وصدق المشاعر، دون ترتيب مسبق، الحب ده حالة روحانية دون مقدمات، ودون أسباب، أنا أو من جدّاً بحديث الرسول فيما يعني (الأرواح جنودٌ مجنّدة ما تعارف منها أئلف وما تنافر منها اختلف).

وقد فسّر ذلك العلم الحديث بالتركيبات الكيميائية، بمعنى له لما شوف حد بأرتاح له من أول مرة، والعكس صحيح،

على فكرة.. أنا بتكلم بذاتي وليس دارس لهذا، ومن هنا تأتي دقة القلب، وسرعة النبضات، واحمرار الوجه ورعشة الأطراف، ده العاطفي منه، والانتظار في البرق والرعد والظلام لرؤية طيف الحبيب، وانصات طبلة الأذن الداخلية لنفس عبور الحبيب، ويتحوّل ذلك إلى مجرى العيون، وتصبح دامعةً لامعةً تتحدّث دون حروفٍ، تُفشي أسرار القلب، وتلجّم اللسان، وهي أصدق كلمات صامته يسمعها فقط هو، أما الطرف الآخر فقد تصل إليه كلها أو بعضها، أو انعدامها، ده يتوقّف هنا على أنه هل يبادل الحب؟ هل يحب بقلبه؟ هل يحب بعقله؟ يجب الحب؟ ولا يجب بإرادة؟ أسئلة حضرتك، وبناءً عليه يتحدّد هل الحب ده هيستمر؟ طب وإلى متى؟

سينتهي ولماذا؟

هل الحب العاطفي يبدأ دون تحديد ميعاد انتهائه؟ نعم، تنتهي لوعة الحب، نضوج، اكتشاف حقائق فيما بعد بالنفس البشرية، وأنا هنا

أقصد حالة الحب الأول، ويمكن تعتقد إن الدنيا انهارت،
.....و..... كل ده عايز حلقات تانية،

هههه لكن في الآخر يتحوّل حب الصدمة إلى ذكرى جميلة، بل
تستطع التعايش معه، ولو قبلته مصادفةً، أما حب العشرة، والأسرة،
والعمل، طبقاً لقدرة حضرتك على الزرع والحصد، يستمر ويزيد
وينمو، بل قد يفوق بل يفوق الحب العاطفي الملتهب؛ لأنه يتخذ بعد
الاقتران، فقد هدأت القلوب لامتلاك الطرف الآخر، كلباتي
ليست ضروري بالتجربة الكاملة، ولكن علمتني الحياة، أما عن
حب البشر وما أدراك، فأنا شكرت حضرتك في الأول، لتقدير
سيادتك واحترامك، وهذه هي الإجابة، تبادل من طرفين، فيظل
ويتطور التقدير والاحترام، وعلى العكس.. هناك منعدمين
الإحساس، لا يقدّرون الآخرين ومشاعرهم الجياشة وتقديرهم
لهم، فيتسببون لهم بأزمةٍ نفسية، تصل لدرس تخرج منه بحكمة،

من لم يكن معي في ظلامي لا أحتاجه في نوري، عندما قالت الذبابة
للنحلة احترسي فإني سأطير من عليكِ،

فردت عليها مبتسمة: وهل شعرت بكِ في وجودك كي أشعر
برحيلك؟

الحروف كثيرة والعبر أكثر، والحب أنواع، وإحساس راقٍ،
كثيرون لم ينعم الله عليهم به، حقيقي.. الحب رزق، نعمة، عنوانك
في تصرفاتك ،خالص تحياتي.

الدرس ده هدية، اللي جاي بفلوس.

الحلقة الثانية:

وكما قلت دي رؤيتي وبأسلوبتي،

رڤروا معي، كنت بتكلم عن كثرة شكوى الزوجات والأزواج،
كل طرف من الثاني، ومحدث طايق حد، وكل واحدة واحدة نازل
دعوات، وعاليز يولّع في الثاني،

جميل كده؟

طيب ممكن نرجع كده لورا، كان تعالوا نشوف.



حبيبي، وحشتني، أمتي بقي هنتجوز؟ أيام الخطوبة دي ملهاش
لازمة، هقوم أجيب لك
برتقال، ماشي يا نور عينيا، وبعد برهة..

حبيبة قلبي، تعبتي نفسك، قشرتيه وكمان قطعتي قطع صغيرة عشاني،
بصي أنا جايلك أيه؟

عروسة المولد.. أغلى عروسة دي بالكهربا، وبتقول بحبك؛ عشان
تسمعها طول الليل، أنا ماشي بقي.

استنى شوية.

بكره يا قلبي، مش هنزهق من بعض، وعالطول معاك في البيت،
حد يسيب القمر ده وينزل الشغل، يا سلام، لا إله إلا الله، كجلي
أنتِ عشان تتقابل.

محمد رسول الله، افكرتم؟ طبعاً عقلك الباطن يعمل مقارنة مع أيام دلوقتي ويبيتسم، وبتقول الله يرحم.. كانت أيام، فين ده دلوقتي، أنا اللي بقشر البرتقال، وهي بتقول يا حسرة، عروسة وبتقول بحبك.. منك لله، وهوب.. أغنية اتخدعنا، اتخدعنا.. خليك معايا.. دي أيام الخطوبة، ارجع تاني لورا بتقولي أبوس إيدك كفاية كده، قلبت المواجه، عارف وحاسس بيكم، تعال بس.. فاكر أيام البرد القارس وأنت منتظرها ترجع عشان تاخذ البسمة، طب حاول تمتكر ضربات الشمس الحارقة، طب افكري أنتِ انتظار تليفونه الطويل، وأنا جاي بكره أطلب إيدك، وأغمي عليك، أروح الكوافير، ولا الفستان، طب خايفة أقع بالشربات على أمه، أيون.. أقصد حماتي.. صفني نيتك، يا بني إحنا بنشتري راجل.

(طبعاً دلوقتي بتقول ده باعوني).

طبعاً يا عمي،



وأنا هحطها في عيني، (وأنتِ بتقولي دلوقتي روح ربنا يخرم عينك)
نظير.. نظير.. زي الغربان، أقصد العصافير.

ونكمل الحلقة الجاية بإذن الله.

الحلقة الثالثة:

ونستكمل معانا أحلى أيام الخطوبة، والحب، والسهر، والعذاب، وتورم العين، والانتظار، وتقشير البرتقال، ويمكن كان حد يقشر لك اللب، ولو رز بلبن حلت بيه هتلاقي حلة، مش دلوقتي ممكن تطلبه وننظر في أمرك، ولو اتعمل يبقى كان شهر شهرين، حسب هتموت أمتي عشان نحققك آخر أمنية، المهم الحياة كانت جميلة، العروسة أو الأمورة، أو المحبوبة، بتتجمل وتظهر كل حاجة زي الكتاب، وكأنها ملاك لحد عمرو دياب ما وقع في الفخ، وقال زي الملائكة لما تشوفها، ولا تسمع صوت ولا نفس، وأسلحة العيون الفتاكة، هي اللي بتتعامل، وكان حضرتك برضه، بتقول طنط ولو سمحت، والبرفان اللي موت نص بنات العمارة اللي فيها حبيبتك، وعيد الأم، والأب، والمولد، والمعلم، والفلاح، ما هي مناسبة عشان تجري تشوفها، وهدايا، و... و... المهم لقد وقعت في الفخ، تعال

بص التجهيز، والمقدّم والمؤخّر، والنيش والشمع اللي مش هتتجوز
 إلا بيه، وأنت بتجيبه بمزاجك، وتبدأ ليلة الزفاف، وكأنك بتتهي
 حياتك بإرادتك، وفاكر وأنتِ فاكرة أن الليلة دي.. انتهت رحلة
 الحب والشوق واللوعة بالجواز، ولا تعلم إنها بداية شوق ولوعة من
 نوع آخر، أنا بسرد من الواقع وليس بعقد الشباب والشابات، لا أنا
 هوصل معاكم بإذن الله لما فيه الخير لحياتنا اللي كلها بقت شكوى،
 والست عايزة تشوي جوزها بعد ما تدبجه، والراجل قرفان من مراته
 أصلاً، ومش عايزها مشوية، هي رؤية والله المستعان

لاستكمال المرة القادمة.

الحلقة الرابعة والأخيرة

الذي نشرته من قبل، لعل وعسى أن يكون ذلك مساعدة لمعرفة معظم المشاكل الخاصة بهذا الموضوع ، رغم أنني على يقين سيظل ليوم الدين،

المرأة والرجل ويتطور الصراع من حب ورومانسية ومبتمش الليل، وشايفة القمر يا شاهيناز، وحببي يا توتو.. الله يخربيت الجواز على اللي اتجوز قبلي ولا نصحني، واللي بعدي ولم يتعظ، رؤيتي هنا الآتي:
* الحياة في الخطوبة حمادة وبعده شاهيناز، لماذا لا تظل دائماً حمادة؟

* لازم كلا الطرفين يبذلا جهدهما لخلق السعادة في البيت.

* للأسف وحقيقة علمية لو وجدت زوج رومانسي هتجد زوجته عكسه، والعكس بالعكس، ومن هنا تبدأ المشاكل، أنتِ مش حاسة بيه، أنتِ اللي مش حاسس بيه؟

المفروض الطرف الثاني يقدرّ مشاعر الآخر، ويعرف إن الوردة والشمعة والكلمة الحلوة دي رثته المتنفسة، هي الدينامو لتحريكه، رسالة على تليفونه، سؤال عنه باتصال،

أنا بتكلم عن الطرفين، عشان المشكلة هنا واحد بيعطي، يمنح، والثاني أناني، طماع عايش على كده، طب ممكن يكون ميعرفش مش مُتعمد؟

حلو، ده نعلبه مرة وتانية وعشرة، هنعمل أيه نرميه ولا أيه؟ ممكن تقضي زما تعله؟

أه والله زي ما بقولك كده، هتوصل لحاجة؟

الصراحة، هتوصل ولكن ربما ليس كما تريد أنت، بس الحمد لله في أمل وعمر.

* حرق الدم ده له ناسه، يعني هتتكلم، وتتخاقق، وضغطك، هيرتفع والتاني فريزر وييشرب تلج كان، أيوه تعمل إيه؟

هتعرف بعد عمر، وجهد من صحتك، أنك بتتعب نفسك، أيوه.

والحل أنك تتعامل معه بالمثل، واشرب وكل تلج، لو استجاب بيتقى تمام، وإن لم أصرف نظر عن هذا الموضوع واتركه له، وكأنك فالطيارة.

* بما يرضي الله، البنات طالعة متحفزة للرجال من صُغرها الفضائيات، ونقل صورة أن الرجل عدو، ولازم المرأة تاخذ حقها، وتسحقه، وتفكه، وتبيعه قطع غيار، ده أبوها.. وأخوها.. وابنها..

وحبيبها.. وزوجها، ولذلك نسب الطلاق مرتفعة وفي الزيجات
الحديثة سنًا.

* كان زمان الأم توعّي، والجدّة تنصح، أما الآن لا أم ولو في
جدّة يبقى كزبس،

هتسمع أتم جيل غيرنا، لازم يعود دور الأم بالنصيحة، وتتعلم الأم
نفسها لتعلم بنتها، وتقولها حافظي على بيتك.. وجوزك.. وابتسمي..
وليبي.. واغظي الشيطان.. وحق الزوج وحق الزوجة، الدين ثم
الدين.

* أيتها المرأة، أنتِ البلم والرقّة والعاطفة والحنان والرومانسية،
احتفظي بذلك، ودعي صفات الرجل للرجل، أنتِ ممكن تخلي
بيتك جنة والله باحتوائك لزوجك ببسمة الأمور تسير وراحة البال،
اعطي لزوجك قدرة أمام اهلك وأولاده، وتقديرك لأهله، سيضعك

زوجك فوق رأسه، لقد كسبتي زوجك كسبتي سعادتك وسعادة بيتك، وكل طلباتك مُجابة وعليها بوسة ووردة.

*بلاش النديّة للرجل وراس براس، أيوه أنتِ زيك زيه في الحقوق والدراسة والتعليم والعمل، ولكن في البيت أنتِ زوجة وهو زوجك بكل ما تعنيها الكلمة والحقوق الربانية، علّوا بناتكم ده، الدنيا هتتغير، عارف إن الكلام ده بالذهب بس ربما استفاد منه كثيرون وكثيرات، وبعد ده أي منشور بخصوص ذلك بالحجز مقدّمًا، وبأولوية الحجز والرسوم طبقًا للحالة والمسافة، عايزين نلم فلوس العيد، ههههههههه.

أستودعكم الله.



جروب الباييز

- لو سمحتوا يا حضرات، كان في قلم مع ابني وقالي يا بابا في بنت اسمها يارا خدته منه، لو ممكن باباها يقولها ده هدية منه ليها ربنا يحفظها.

- أيوه يا أستاذ أنا باباها، شكراً لذوق حضرتك، وهي بكره جاية هدية لابن حضرتك، مسطرة هتعبه، كنت بسأل حضراتكم في ماميز بتقولي لابني ابقي خلي مامتك تحميك، لو سمحت الأب اللي هنا يشوف مراته الماميز دي، والمرة الجاية هقول اسمها.

- من فضلكم يا حضرات عايزين نقعد نتكلم في مشروع مفيد لأولاد المنطقة، وفي ماميز عايزة تعمل مشروع كوافير، واحنا عايزين نعملها مكتبة، فياريت نقعد نشوف الماميز دي، أقصد الموضوع ده.

- أه والله يا حضرات يبقى ممتاز كوافير رجالي محتاجينه، بلا يا أستاذ كوافير حريمي وباديكر ومناكير وحنة شيماء.

- فعلاً يا جماعة إمبراح مراتي سمعتها بتسأل في جروب الماميز على المسقعة هي ليه اسمها مسقعة، وواحدة ردت عليها قالتها مش لما نشوف ميس سعدي وطالباتها الأول، راحت دخلت عليهم واحدة قالت المسقعة باللحمة المفرومة تحفة، راحت مراتي قالت لها طب ومشروع الباديكير.

- أيوه حضرتك عايز تقول إيه؟

- يا أدمن، لو سمحت يا أستاذ عباس شوف الحكاية عندنا شغل من الفجر والرجالة مش ساكته، ويا جماعة متزعلوش نفسكم، ده حتى مراتي بتقولي بنتتار خلاص ألوان الكراسي والمرايات، أزاي حضرتك وساكت مش تقول، ده إحنا خلاص كلنا شركة الطابعات والأدوات الدراسية علشان المكتبة، أقوم أصحي بقى كلنا كده.

- يا جماعة عندي فكرة تحفة هتريح السكان والمنطقة، إحنا نلم فلوس للمشروع ونعمل مكتبة، والباقي الماميز تاخده وتروح تعمل باديكربحلوقي ومناكير فحولقي وريح دماغنا.

- يا سادة ينفع كده يعني الرجالة بتكلم في الدراسة والمدارس والكتب ومكتبة، والماميز بتكلم عن كوافير والطبخ، ده حتى أول إمبراح كنت سامع ماميز بتزعق في مراتي هي تقولها ميس فوزية.

- عايزة خريطة بكرة، والماميز تقولها لما نخلص وصفا البانية المسلوق بالسلق، وكانت خناقة ساعة بحالها، والماميز دخلوا يهدوا الاتنين، وواحدة عاملة تقول أنا مش هسكت متعرفوش أنا مين، أنا اللي قلت الأول عايزة طريقة غسل السجاد بشورية المحشي، وكانت ليلة... الدنيا هديت بس لما اتصلوا بميس فوزية علشان الخريطة، وقالت لا النشاط اتغير وبقي مجسم خشبي

بطعم السبانخ، لقيت جروب الماميز ده ومراتي قطعوا النفس خالص، مش عارف انت قطع ولا إيه.

- خلاص يا حضرات إحنا بكروب الباييز ناخذ قرار ونبدأ في مشروع المكتبة بعد صلاة الجمعة الجاية.

- أيوه يا أستاذ، حضرتك الجمعة الجاية مراتي متفقة مع جروب الماميز هيروح النادي مع ولاد المنطقة كلها، ويناقشوا مشروع الباديكير ده، والله ما أنا عارف إيه الباديكير ده، ولا الثاني اللي اسمه مناكير.. وفي حاجة يقولوها إيران تقريباً تحت العين باين أو فوقه.

يا حضرات تصدقوا بالله بالليل كانت في خنافة حقيقية في العمارة اللي جنبنا، في ماميز بعثت لمدرسة ابنها بتقولها ليه في حفلة احتفالات أكتوبر لبستوا ابني لبس العدو، والمدرسة تقولها دي

حفلة توضيحية للأطفال وبنعالمهم، ومتقسمين مجموعتين أمام بعض،
والماميز دي أبدأ أنا مش هسكت إشمعنا ابني، وحضراتكم جاينين
تقولوا مكتبة ولا كوافير؟!!

- خلاص أنا كأدمن لجروب الباييز هكلم أدمن جروب الماميز
وأتشاور معها وأقولكم القرار النهائي مكتبة ولا كوافير للمصلحة
العامة، ساعة كده وأرجعلكم.

وبعد الساعة، السادة أعضاء جروب الباييز، أنا كلمت خلاص
أدمن جروب الماميز، والحمد لله اتفقنا، وأنا اقنعتها، وهي بصراحة
بكل ذوق حلت الموضوع، وقالت خلاص مش هنعمل الكوافير،

هنعمل مطبخ جماعي للماميز،

تمام يا حضرات؟



- يا حضرات؟
 - يا سادة؟
 - يا جروب الباييز؟
 - هو محدش بيرد ليه؟
- الظاهر مويل هنج.

جروب الماميز والبايز أكثر حاجة خلت الناس
تكتشف إن التريية مش بس للأطفال 😊



الطبال والعصفورة

أول مرة أخرج عن الإطار الأدبي وأتعرّض لهذا العنوان وبوقاحة أقصد صراحة، نعم.. ناس كثيرة تعمل بتلك الوظيفة بعلم وبدون علم، ولكنه يعلم،

يعلم أنه طبّال ومعه كل أدوات التطبيل، فهو دائماً كل فعل يصدر من مديره يذهب بل يطير ليخبره بآخر ألقانه وبوتر حساس، بل يستخدم أداة عظيمة من أدوات التطبيل ألا هي (النفخ)، وكلما نفخ طار مديره يحلّق في السماء، ودائماً تلك الوظيفة بتكون بمواصفات معينة، لكي تستمر فيها وتُقبل فيها فلا بدّ لك من صفة الوقاحة والندالة والحسة وانعدام الضمير مع المحافظة على الصلاة جماعة في المسجد، وعدم مسك السبحة في يدك؛ فاللسان يستغفر، ويذكر الله ليسمعك الناس، وعندما تتمكّن من هذه الوظيفة لا بدّ وحتماً أن تجودَ وتبدي أفكارك تعاطفاً لمديرك لاتخاذ قرار يصب في مصلحتك، فلا تنسَ صفة الندالة المطلوبة، ثم تذهب لمن أُتخذ

في حقه القرار، وتبارك له لتحقيق صفة الخسة، وإذا تجاهلت
المباركة، فأنت محترف الوقاحة، فقد صوبت بدقة وتشاهد المشهد
من بعيد بين الرئيس والمرؤوس مع قهوتك المفضلة.

وهذه الوظيفة لها ناس قذارة يتم تعيينها وبعلمها تحت ستار الأمانة
والشرف والنزاهة، وينطلق هنا أي مدير إدارة في جذب هولاء،
ويسمع لهم ويشدو بهم، ويمكّنهم أيضاً من أمور، ويصبحون هم
وهم فقط على الحجر يتناولون المصاصات والكورن فليكس، وبالونة
العيد، وقس على ذلك أي مكان في إدارة، محل، متجر، مكتبة،
البقاء لهم فقط،

والجانب الآخر أن يُعينَ لهذه الوظيفة وهو لا يعلم أنه مُعين ولكنه
يعلم! نعم فهو استدرج من رئيسه ليوظّفه هكذا، وليس باتفاقٍ
مسبق، فيعلم أن ذلك مرغوب ومحجوب فيستمر.

أما (العصفورة) دي وظيفة أيضاً بتصلي وبتصوم وبتزكي، وهي ناقلة الأخبار بملاح وجهك، وبما تناولته وشربته، وفين ومقاس ملابس الداخلية كان، فهو عصفور متنقل ولا مانع من مساعدة بعض الغربان له، ثم تصل العصفورة فوق مكتب رئيسه يتناول قهوته بشموخ مرتدي دبوس

الكرافتة تفشي كل الحروف، ولا مانع أيضاً من زيادة البهارات؛ فالطعام الحار له مذاقه أيضاً، وهنا انتهى دوره، ولكن ممكن يعمل بوظيفة الطبال نفس اللحظة؛ لينال شهادة الحقارة مدعومة بالثناء والتقدير، و(العصفورة) يعلم بأنه غراب ويمارس ذلك بكل تواضع تحت ستار الحماية والخوف على المكان، ونلحق قبل فوات الأوان.. وهكذا،

ومهنة (العصفورة) بتكون اختيارية، وبدافع أمني متطوعاً، ومنها بتكون

إجباري برغبة مدير المكان، بدافع معنوي ومادي وعاطفي وانسجام متبادل، والحقيقة العلمية أن مَنْ يُسيطر على هؤلاء الأفاقين مختلفين الذمة، هو المدير الناجح في مكانه، بل مرؤوسيه ناجحين أكثر، والإدارة كلها ناجحة وبتفوق؛ لأنه ساد العدل والصواب والحقوق، ونمت النزاهة والعفة، وتعالى المصلحة العامة والهدف الأسمى.





كيف تطفشي زوجك؟

يسعدني كمؤلف لكّابِي السّاحر (للمتزوجين فقط) (الطبعة الرابعة) أن أقدم هذه الوصفة السهلة السريعة لكل زوجة تحب، وبكل سرور تخسر زوجها وتطفشه من قلبها قبل بيتها.

نعم ما هو الزوجة بتاخذ الشقة والشبكة، والمنقولات والعيال، والتليفون والغاز، والمياه والكهرباء، وقبلهم صحتك وجهدك في تأسيس الشّقة دي وشراء المنقولات دي، وطبعاً الشبكة ومصاريف الحمل والولادة والتربية والمدارس، يعني أنت بعدها بتبدأ من جديد على الزيرو تجهّز نفسك من الأول، هو أنا لما قلت في لقاءاتي الإعلامية أننا بصفتنا أزواج نطلب بالمساواة بحقوق الزوجة، أو في العموم مساواة حقوق الرجل بحقوق المرأة، شوف كده حالات التحرش من الفتيات الآن باللمز والغمز والكلمات وغيره للشباب، وحتى لو متزوج عقابها إيه

نرجع للوصفة السحرية، عزيزتي الزوجة، ورقة وقلم ومع بعض
هنسجل تلك النقاط، وبعدين قَطِّعي الورقة واحفظيها في عقلك
وليس قلبك؛ حتى لا تضعفي وتنفّديها.

*البوز الخشب، أرجوك لا تنازلي عنه دائماً وأبداً.

* كل مناسبة سعيدة أو إجازة أو عطلة لازم قبلها تكوني مجهزة
مشكلة، تتكدي عليه بيها ولازم تكون مختلفة عن اللي قبلها، عشان
ميقولش وش نكد.

*مع كل فسحة لازم هتشغليه بعدد الشنط، كده بدأت أول
خطوات الغضب، ثم تعليقاتك في الذهاب والعودة، وشوية توابل
في أثناء الفسحة من نوعية طلبات المنزل والمدارس وملابس الشتاء
وجلدة الحنفية، لما تروحوا البيت بقي أحذرك تشكّره على الفسحة،
ولكن هتقولي (هو كل فسحة كده لازم تتكد علينا)، دي جملة
مفعولها سحر، ممكن تقتله بسكّته وتخلصي.

* وهو راجع من شغله، إياك تنتظريه على الباب ببسمة وكوباية ليون إطلاقاً، هنتذكر الوش الخشب، وكان مش أنتِ اللي تفتحي الباب، أي حد معدي بالصدفة حتى لو البواب، أنتِ هتستلميه بعد دخوله، شفت العيال عملوا إيه؟

وممكن تحطي وصل الكهربا في دخوله على أول تراييزة تقع عينه عليها، بتجيب نتيجة فعالة جداً، هيحاول يدخل ياخذ دش، أنتِ وراه أنا مش بكلمك، الأكل جاهز أنتِ حرقى.

*لو دخل ينام شوية، هتحاولي بشتى الطرق تطيري النوم من عقله، يكون مُغيبٌ يعني، لما يقوم بقى ويحاول يشرب شوية شاي بالنعناع، ركزي بقى عشان دي القاضية، عندك اختيارات؛ أما هتقولي قوم أعمله لنفسك؟

أو تعمليه وتطفحوله، إزاي؟

هقولك متخفيش لسه معاك، لما هتجيبى الشاي هتلاقيه باصص في السقف، يحاول يعيني يفصل عقله عن الواقع، فرصتك هنا بقى، هتقولي (سرحان في مين، وهي لو تعرف القرف اللي أنا فيه مكنتش فكّرت فيك).

هو مذهول لسه، ويحاول يتجاهلك، اعلمي مداخلة ثانية (البوز الخشب مع نفخة)،

أول ما هيقولك مالك، على طول ردك جاهز (ما أنت لو مهم كنت عرفت لوحدك).

هو كده خلاص استوى، آخر محاولة أنه يحاول يفتح يوتيوب يسمعكم حاجة مع الشاي، وبالصدفة جات أغنية (اختياراتي مدمرة حياتي).

بس كده.. جنى عل نفسه.. على غرفتك وارزعي الباب وراك.

لو نجى هو من السكتة الدماغية هيدخل في جلطة قلبية، ولو نجى غالباً يا غيبوبة يا شلل رعاش، أقل الاحتمالات هينزل من البيت وينخر،

وهتكوني أنتِ سبب خروجه وطفشانه وانحرافه مع أصدقاء السوء، وهتكون دي بداية النهاية؛ لأنه خلاص طفش من قلبك، وترك دينتك، وسلك طريق تاني وتالت.

وللحوار بقية في الحلقة القادمة، علشان تأثرت جداً جداً بموقف الزوجة، وأيدي بتترعش في الكاب، ربنا يصبرها وتنجح في مهمتها.



الرجل الغامض

في كل مكانٍ نجد هذا الغامض، وما يميّزه أنه ينتهي الحدث بحضوره،

كان هذا حديث دائر بين أحد ركاب الميكروباص.

تصدق حضرتك الراجل الغامض ده في كل مكان، ومجرد ظهوره يخلّص أي مشكلة.

- والله عند حضرتك حق، ده مفيش جهة أو مكتب أو شركة حتى أروح أخلص فيها مصلحة إلا ويظهر الراجل الغامض ده يكش ملك ويخلص.
- يا أسطا، يلا عايزين نمشي ورانا أشغالنا منتظر إيه كل ده؟
- منتظر الميكروباص يكل، يعني همشي فاضي، فاضل الكرسيين اللي جنب السواق ونمشي على طول.

- يا حضرات، عايزين نمشي، إيه رأيكم نجمع تمن الكرسيين من بعض؟
- هرج ومرج في الميكروباص بين مؤيد ومعارض للاقتراح ده،
- وفجأة يجي حد يفتح باب الميكروباص ويقول للسواق يلا يا أسطا أمش، أنا هاخذ الكرسيين اللي جنبك ليا، اطلع.
- الركّاب بصوا لبعض ، وواحد منهم كلم اللي جنبه وقاله مش قالتلك الراجل الغامض ده في كل مكان، شوفت أهو جاه وخلص المشكلة ومشينا.





خناقة العيد وخناقة الإجازات، والفرق بينهما.

كل خناقة وأنتم بخير وفي أفضل حال، ودايمًا عامر بحسكم وتعيشوا
وتتخائقوا، خناقة الإجازات دي بتكون حاجة كده زي القهوة
المظبوطة كده بالميعاد، والثانية بتبقى دايمًا معروفة قبلها أن في إجازة
بكره، إجازة الخميس والجمعة، الإجازات دي بتكون معروفة قبلها
بالميعاد، بتكون بيتحضر قبلها من ليلتها أو قبلها بيومين.

موضوع الخناقة اللي هتكلم عليها خناقة الإجازة،

ودي غالبًا بتكون من الحاجات اللي بتدي طعم للإجازة؛ لأنها
من غيرها ما تتحسبش إجازة، وتبقى أنت محظوظ لو كانت الإجازة
دي بتبقى الخناقة بتاعتها معروفة مسبقًا على إيه، وتبقى عارف إن
موضوع خناقة ده متكرّر، فأنت بتبقى من المحظوظين جدًا لو
الخناقة هي المتكررة معاك دايمًا في الإجازات، أنت في الوقت ده
بيكون جسمك تنحس وتبلّد، وفقد كل معاني الإحساس، أنت هنا

بتكون بتستعد خلاص في الإجازة، ما شاء الله عليك بقيت جاهز لأي موقف في الإجازات وفي الخنافات .

فأنتَ في حالة (للمتزوجين فقط) وهؤلاء هم أصحاب الحظ الأكبر بنسبة ٩٩,٩% الفائزين بهذه الخنافات.

خناقه العيد ،دي بتكون عدت مرحلة العالمية للخنافات، ويعني اللي سماها خناقة العيد ظلها؛ لأن دي بتبقى حاجة مُقدَّسة مش موجودة طول السنة ،الخناقات دي بتبقى حاجة مُقدَّسة مش موجودة غير في التوقيتات دي، وبتبقى حاجة يعني أساسية ورسمية، والخناقة دي لازم تيجي لك سواء أنت رضية أو ما رضيتش، لازم هنا خدتها عيدية، نخذها وأنتَ راضي أحسن ؛

لأنك بتخذها مع الإمضاء مع الإجازة، يعني وأنتَ بتاخذ إجازتك كده في شغلك، ويقول لك كل سنة وأنتَ طيب، بتاخذ معاها تذكرة اسمها

(خناقه العيد)، وغالباً ذهاب فقط بلا عودةٍ، العودة على ربنا وتميَّز أنها فور وصولك للبيت بتسلِّم التذكرة في البيت، عشان يبدأ التعامل معاك على أساسها كام يوم نكد، وكام يوم خناق، وكام يوم مناهدة، وكام يوم مرضي

طبّقاً لمدة (الخرناقة) أقصد الإجازة، ودي بتكون حاجة يعني أساسية عمرك ما هتتحس بفرحى العيد أو ببهجة العيد إلا لو أخذت الجرعة بتاعت خناقة العيد، وبتكون ليها أسباب كثيرة بصرف النظر يعني أنت ممكن تختلف هتروح فين طب؟ هتاكل أيه؟ ولو اتفقنا هنبلس أيه؟

ده غير تفاهات وأشباح وطلاسم غير معلومة وهتفضل كده ،
خرناقات العيد بتكون فيها متعة كبيرة جداً، وبتختلف من عيد لعيد،
يعني الأعياد القومية غير الأعياد الوطنية، غير عيد الأم، غير عيد

الأب، غير عيد الأخ، غير عيد الأخت، مؤخراً في ناس شريرة
جداً بتنادي بإلغاء الأعياد،

وإلغاء المناسبات عشان نمنع الخنافات، وطبعاً الكلام ده ما
ينفعش، دي تبقى خسارة فادحة لازم الخنافات يا حضرات،
الناس لازم تصر على إجازات العيد، من غيرها منعرفش نعيش،
من غيرها هرمون النكد هيتأثر، حافظوا عليها وسلّموها للأجيال، ولو
لسه محتاج زيادة الجرعة شوف أي مسلسل عربي لازم هتفوز
بمشهد سواد ونواح أصيل.





زيارة بطلاق

- مالك يا حبيبي من ساعت ما رجعنا من عند صحي وأنتِ ضاربة بوز.
- مفيش.
- حلو أوي أوي.
- مالك بقي؟
- قالتك مفيش.
- أيوه النكد هبدأ، الشفرة أنا عارفها.
- أعمل نفسك بقي مش عارف اللي حصل عند صاحبك ومراته.
- لا يا حياتي، مني للي كلت درع جوزها لو عارف.
- ما أنتَ لو مهم كنت عرفت لوحدك.

- أه هي وصلت لو مهم، ده كده أسبوع نكد على الأقل.
- هزّر واضحك براحتك، كله بحسابه.
- وكان حساب لا؟ حلو جدّا، مع نفسك بقي.
- تعال هنا، أنا مش هعدي الموضوع ده.
- أنا بقول أقوم أحضّر شنطتي أحسن، لا أنا فاهم في إيه ولا مين.
- عدى على مين، ولا القطار دهس مين؟
- اعمل نفسك مش واخذ بالك ما أنا عارفك.
- ياستي .. يا حجة .. يا هانم .. في إيه؟
- صاحبك.
- اشمعنا؟

- مش شايفه إزاي مهم بمراته؟
- لا مخدتش بالي.
- أيوه طبعاً، هتاخد بالك إزاي من الرومانسيات دي.
- الحمد لله، عرفنا السبب.. الرومانسيات، خير بقى؟
- أنتَ يعني مخدتش بالك؟ هو عمال يحب فيها ويدلعهما في كل حاجة بتعملها.
- فين الدلع ده؟
- أنتَ بجد لا تُطاق، وأنا عارفة نصيبي وحظي وجوازتي.
- طب أنا هسكت ولا هعلق، اتكلبي براحتك بقى.
- أنتَ هتموتني من الغيظ، الراجل عمال يقولها كل شوية يا حبيتي.

- هاتي الغدا يا حبيتي، اعلمي شاي يا حبيتي، تسلم إيدك يا حبيتي.

- ولا همه إننا موجودين، والفاكهة يا حبيتي، والحلويات يا حبيتي، أنتَ قاعد تمثال مفيش أي حرف ولا كلمة، أنا مش قعدالك في البيت وطلقني، وشنطني جاهزة، ومفيش سلام كان، ورزعت باب الشقة وراها.

• أنا مش عارف مالها دي، صحي ده خرب بيتي، أنا لازم أتصل بيه أعرفه.

• ألو، أيوه يا خراب البيوت، ده كان عشاء أسود، مش قادر تنتظر لما نغور وتبقى تنادي على مراتك حبيتي .. حبيتي .. خمستاشر مرة حبيتي لما خربت بيتنا.

(صاحبه على السماعه، اسمعني بس يا غالي، أنا مكسوف أقولك
والله،

أنا متجوّزها من سنين، وبقيت بقولها حبيتي؛ لأنني ناسي اسمها).



عيد الجواز له معنى آخر

النهاردة عيد جوازنا، أنا فاكرة طبعاً، هو ناسي طبعاً، بس أنا مش هفكره، وهزعل إنه نسي، وهستناه يعتذر ولو اعتذر، مش هسامحه بسهولة،

ومع نهاية اليوم، هيقول لي: "كل سنة وإحنا طيبين يا حبيبتى".

هرد عليه: "حب إيه اللي جاي تقول عليه؟"

هو بالنسبة له عيد، بالنسبة لي يوم مراجعة حسابات، هو شايفنا حلوين مع بعض، أنا شايفة إني كنت حلوة لوحدي أكثر،

كل سنة والجواز بخير، والنيش لسه مقفول، وأنا لسه بضحك من جوايا، علشان محدش يلاحظ إن في حاجة.

تعليق الكاتب: في الجواز. أخطر أيام السنة هو "عيد الزواج" مش لأنه

يوم احتفال، لكن لأنه بيقيس "المسافة بين اللي اتقال واللي اتفقد".



قاموس الحياة الزوجية

في قاموس الزواج، في كلمات بتتقال بمعنى، ويتفهم منها معنى ثاني خالص، يعني جملة بريئة شكلها عادي، بس وراها "عش دباير" .#

براحتك " لوي بوز".

مالك؟ مفيش؟ "متخزن لك" .

لو مهم كنت عرفت لوحك "فعل غير متوقّع".

" خليك فاكر "في عز ضحكتك هتفكر

" هتاكلوا إيه بكره؟ "نخ هيتعمل عكس اللي هتقول.

" مش هنخرج "ليلة سودا نكد حتى لو خرجتها" أنا مخنوقة

"عادي.. بتتقال في أي مشاعر مبهجة.

" لما توصل ابق طمّني "بداية العدّاد + المسافة + الثقة".



" اتصل وأنتَ جاي "بامبرز + فينو + زبادي + عيش".

" مجبتش ليه الثاني؟ "لو جبت الأول.. كان مجبتش ليه الأول".

!" إيه رأيك في...؟ "خدلك ساتر أي إجابة تخلف".

" تليفونك بيرن "تحريات شغالة.

" خارجة زيارة "تليفونك مفتوح + متابعة إحداثياتك.

" هات المسلسل "انعكاس الدراما عليك: حزن + عياط + أحداث.

" --- وكفاية كده النهاردة، ولو في العمر بقية، نكمل بجزء ثاني.





متعة سواقة السيدات

٤

السواقة للسيدات متعة ورفاهية، ولها القدرة أنها تسوق وهي تاركة أعصابها في فريزر المنزل، بل الأكثر اندهاشاً ممن تترك اليدين كمان، بقولك إعجاز علمي يُدرّس في علوم السواقة،

هناك سيدتي الفاضلة حكمة لا يعلمها إلا حضرتك وهي حكمة إصرارك أن تقفي بالسيارة بين سيارتين واقفين لركن سيارتك، وإصرارك أن تدخل بينهما بمقدمة سيارتك وليس بخلفية السيارة، وبالتالي لا ترى مقدمة كلا السيارتين، وغالباً بتصدمي الاتنين عند الدخول بينهما، أو بتركني ومبتعريفش تنزلي من بابك؛ لأن السيارة بجوارك غلطانة، بابها هو اللي قفل عليك بابك، أو بتقفي في منتصف الركنة وتطلي المساعدة أغيثوني، حد ياخذ المفتاح ويركن، أصلي مستعجلة، الحقيقة.. هنفضل نتعلم كل يوم الجديد، وأما الفتنة التي أخشها، وأدعو الله أن يجنبها الكل، عندما ترى سيارتين متصادمين وهما الاتنين سيدات، وكل واحدة تدم في الأخرى لسواقتها، فتلك

اللحظة هي الفتنة بل اللعنة فلا بدُّ أن تفر بسرعة من بينهما قبل حلول
اللعنة عليك، لما ده رأيهن في بعض، أنت هتروح فين؟

نحن أمام سر عظيم يخترق عقل المرأة، وخاص جداً بها، بل تنفرد
هي به كل الانفراد عن الرجال، عزيزتي المرأة، كام أنتِ رائعة في
ذاتك وثقتك بنفسك وأنتِ أمام عجلة القيادة في السيارة،

وكأنك على كرسي الوزارة!

وكم هي قرارتك السريعة النافذة حينها!

وطبعاً ده أسلوب تعجب في البلاغة، فحضرتك تقودي السيارة
منفردة بالطريق وكأنك وسط السحاب لا ترى منه الطيور،
وتسخدمي الإخفاء والتمويه بجدارة، فلا أحد يعرف نواياك يمين ولا
شمال، هتلف الدوران القادم ولا مستمرة على طول، ويا ترى هي
ماشية تعبانة أو مريضة لا قدر الله، واجب الاطمئنان، فالسير ببطء
مقلق، ربما ذبحة أو حالة ولادة فجأة، أو في عطل في السيارة،

فتمّاً لازم تنخّطى حضرتك للاطمئنان، وجفأة دوران يميناً دون أي إشارات؛ لأن غالباً بعض السيدات لا تنظر للتفاهة دي هو محدش يعرف رايحة فين دي حاجة خاصة وعيب، فالدوران مع عدم إشارة بيرجع أن بعضكن لا يعرف مكانها أصلاً فين، فالسيارة والأخرى لا يعرفن استخدامها، وما تبقي دي حياتي الخاصة، ولو هتاخدي الدوران يا ترى أخده بسرعة وشمالي ولا ببطء ويمي، القرار بيكون في لحظتها، حضرتك مش محضرة من قبلها، وبالتالي الدوران بيكون بمقطورة وبسرعة حادة وقاطع الطريق من أقصى الدوران شمال لحد الرصيف اليمين،

طب والله زي ما بقولك كده، وأمام عيني والطريق كله وقف جفأة وتحاشي المرور بجوار السيدة الفاضلة؛ حتى نظمئن على القرار الصائب ثم

سيادتك، وبكل هذه الثقة كان بتستخدمي الموبايل، لا وماسكة بيد
واليد الأخرى تاركها لنا ربنا معاكم،

أتم وحشين أوي يا جماعة، يعني أسوق ولا أشوف، البنت خرجت
من النادي ولا طريقة عمل البامية بالبطاطس.. أنه الإعجاز
حضرتك،

وبناءً على ذلك..

لحضر كن الطريق، وأي حد ماشي تاني يمشي بعيد حتى لو هياخذ
الطريق الساحلي الدولي،

لا تنتظر من أي امرأة تقود تفصح لك عن حياتها الخاصة بإعطائك
أي إشارة من أي نوع لاتجاهها أو دورانها،

لا تركن بجوارها أو أمامها أو خلفها، اترك البارك كله لها لو رأيت
أي سيارة بها سيدة تقود، وبتتحدث في تلفونها ذات اللحظة وييد
واحد، اطلب الإسعاف تقبلكم الناصية القادمة،

تذكر دائماً أن الدوارانات لها بمقطورة فانتظار الاستقرار

لو وقفت سيارة أمامك فجأة، وبالتالي اتصدمت بها، وبالتالي من خلفك اتصدم بك، أرجوك لا تنزل؛ لأنها حدثت معي بالفعل، ونزلت وجدت الأمامي سيدة والخلفي سيدة، فعرفت أنني من المحظوظين ورفعت أمري لله.

وأخيراً، كل من منح رخصة لامرأة فهو محظوظ؛ لأنه محاط بهالة من الدعوات طوال اليوم والليل.



أنا ضد النكد.. أنا ضد الكسر

ده زوج فاهم كويس جداً أن زوجتك متعرفش تعيش من غير ما تتنفس النكد، ولازم جرعات على مدار اليوم، بحيث لا تفقد تركيزها في الدم، فهو دائماً مستعد لذلك، وهذا الزوج حالة خاصة جداً؛ لأنه فقد المشاعر، وتبدلت مشاعره،

ترى ماذا يفعل؟

هيا بنا نشاهد يوماً مما تبقي من عقله وعمره.

-حبيبي مش أنا قتلتك وأنت نازل خد الزبالة معاك وهات الفينو وأنت جاي؟

-فعلاً يا حبيبي، هو أنتِ فاكرة أني نسيت، ده أنا قلت لما أرجع أشوفك الأول واحشتيني وأخذ ورقة باقي طلباتك وأنزل مخصوص، وأنا راجع كده من شغلي عرقان عطشان جعان زهقان قرفان.

-ومن أمتي الكلام ده؟ وقولي مش مهم بك ولا بطلباتك، ولا فاكرك ولا بسمعك، ولا شايفك ولا حاسس بيك، مع أني أنا اللي عمل كل حاجة في البيت ده أكل وشرب وغسيل ومذاكرة.

-حبيبة قلبي المريض، متقوليش كده، ده أنا علشان شايفك وحاسس بتعبك ومجهودك الجبار اللي محدش بيعمله في الدنيا غيرك بس ولس

فقط ، قلت إيه رأيك يا واد تجيب غداء جاهز من بره مفاجأة اليوم لك وزمانه جاي ورايا دليفري، إيه رأيك بقي؟

-يا نهار أسود بقطران، غداء من بره!

كان مش عاجبك أكلي، دي بقيت عيشة لا تطاق، وانا واقفة طول اليوم في المطبخ أعملكم الطفح، وتعبت فيه.

-ليه كل ده يا نور عيني اللي راح ، حطي الأكل في التلاجة لبكره،
وتبقي ريحتي بكره من المطبخ، واليوم نستمتع بالغداء الجاهز مع
بعض والبسمة والبهجة والفرحة والرقصة والموسيقى.

-أنتَ عايز تجنني يا راجل أنتَ، إيه البرود ده؟ مشاعر إيه وزفت
إيه، وحرق أعصاب، وأمراض الدنيا اللي فيا بسببكم، مش بقولك
مش مهم ولا حاسس ولا شايف.

-طب إيه رايبك نتغدا ونخرج شوية نقعد مثلاً في مكان على النيل،
أو وسط الزهور والأشجار؟

-هو مفيش فايدة فيك، كل ما أقولك على حاجة تحرق الدم ترد
بهدوء وبرود.

-اه حبيبتى ما تبقي من عقلي، ما أنا فاهمك أنتِ مش عايزة كده،
أنتِ عايزة تشبعي هرموناتك بالنكد، وأنا مش مديها فرصة يا حرام،
وعلشان كده حاسك مش مبسوطه.



-ولما أنتَ فاهم كده سايني أغلي ليه من الأول؟

-عندك حق أنا اللي أستاهل الإعدام رامياً بالمسامير، تعالي نبدأ من أول الخناقة.

-بجد حبيبي، طب يلا كده وريني إزاي هتخليها نكد أسود علينا.

-أيوه نسيت أجيب الفينو وأنا راجع ومش نازل تاني.

-مش بقولك أنتَ اللي هتخرب البيت بعندك، ولا حاسس
بالإنسانة اللي معاك، ده أنا اتقدم ليا عرسان وكنت بختار بمزاجي،
ده حتى خطيبي الأولاني لسه شايفاه في الهاير بالصدفة مع خطيبته
الجديدة، وبص ليا وفرح جداً، ولقيته بيكلم خطيبته في ودنها من
الفرحة.

-لا يا أستاذة ده لقيه فرحان بخطيبته الجديدة وبيقولها الله يكون
في عون المغفل اللي اتجوزها.

-بقي كده؟ ولما هو كده قاعد معايا ليه متمشي مع السلامة، ومش
عاملة أكل، وهقفل البوتاجاز كان على الحاجة، وحتى لو جبت
أكل من بره مش هأطفح منك حاجة.

براحتك، بس يارب تكوني مبسوفة كده بالنكد العظيم ده ومستمتعة
أنتِ وهرموناتك،

بلا حرقه دم، أنا اللي غلطان، كنت بدأت كده من ساعت ما
رجعت البيت وخلصت، بدل الوقت اللي راح ده، أروح بقي أقعد
في الصالون مع نفسي مع الغدا والشاي والقيولة وهغني كان.. (أنا
ضد النكد.. أنا ضد الكسر).



زوجتك تنتظرك في المنزل (لف وارجع ثاني)

كانت لهذه اليافاطة التي على الطرق الأثر البالغ في أمور عديدة، ولاسيما الأمور المتعلقة بالمرور والصحة وزيادة القوى الشرائية وغيرهم، عزيزي القارئ إذا أردت أن تتذكّر تلك اليافاطة وأثرها على المجتمع هيا بنا..

فقد أثبتت الدراسات تأثيرها على الناحية المرورية، فقد أدى ذلك إلى خفض السرعات والسير ببطءٍ شديد، ومنهم من حاول الرجوع للخلف، وبذلك تم الاستغناء عن الرادارات في الطرق، كما تلاحظ كثرة اليوتيرن للسيارات وتغيّر الطريق، مما قلّل من الكثافة المرورية للطريق،

وتلاحظ أيضاً أن اللي بيروح مبيرجعش، فأصبحت الطرق فاضية، ومن الناحية الصحية تراجع مرض الزهايمر للرجال وتقوية الذاكرة، فكلها نظر لليفاطة تذكّر الأسئلة وإجاباتها التي تنتظره في المنزل، فطوال الطريق يسترجعها،

وكذلك كلها قرأ اليافطة، تذكّر كل التواريخ والأعياد القومية والوطنية والرومانسية والزواج، وما هي الهدية المناسبة قبل دخوله المنزل، وذلك تدريب ممتاز للعقل والذاكرة، ومن ناحية زيادة القوى الشرائية، فكلمنا نظر لليافطة، تذكّر عبارة الصباح

اليومية (خد الزبالة وأنت نازل، وهات الفينو وأنت راجع)، وبالتالي الإقبال على شراء الفينو والمخبوزات، وارتفاع مبيعات الهدايا طبقاً للمناسبة، والإسراع في الشراء بعد رؤية اليافطة،

وزيادة معدلات بيع منتجات المطاعم، فكلمنا قرأها

تذكّر العبارة الشهيرة (هناكل إيه النهارده؟) فبسرعة البرق ينزل يشتري المطلوب حتى لو تونة.

وفي هذه الفترة حدث فيها ترابط لصلة الرحم عما كان قبل ظهور تلك اليافطة؛ فهي جعلت الكثيرين كلها رأوها، غيروا سيرهم لزيارة

الأقارب والتواصل مع الأصدقاء، مما كان له الأثر العظيم في السلوكيات الإيجابية،

وكان بالنسبة للمحاكم الأسرية انخفاض ملحوظ وبشدة في عدد المشاكل المعروضة عليها،

وحتى الآن جاري البحث عن صاحب هذه الفكرة وتلك العبارة (زوجتك تنتظرك في المنزل)، وكيف تفتك ذهنه، ومن أين جاء بها، حتى يتم تسجيله في الموسوعات الصحية والمرورية والبورصة، وقد توصل أحد العلماء أنه لا بُدَّ من منحه جائزة نوبل للسلام.



سيب الفيذا في البيت

وأنتَ خارجَ مع المدام علشان عايزة تجيب ليها بلوزة، خلي بالك
علشان تعدي يومك ده والأسبوع اللي بعده على خير.....

هتعمل الآتي قبل الخروج:

-هتكون واخد دش ساقع قبل ما تنزل،

واكل قطعة ثلج مثلج بارد

* سيب الفيزا في البيت

- ملابسك فضفاضة وكوتشي مريح

- معاك ترمس كبير شاي، وواحد تاني للقهوة



*سبب الفيزا في البيت تاني بفكرك

- سندوتشاتك ومسلياتك وحلويات

- كل أدوية الضغط والقلب والجلطات

سبب الفيزا في البيت بفكرك بس

تعمل الآتي أثناء التسوق:

- هتمشي تصفر باصص في السقف، ودي لحكمة أن أي حاجة

تتعجبك وتقولها عليها، المدام هترميها وتهتبرك من الإنسان البدائي.

-هي هتاخذ رأيك في اللي اخترته، اوعى الحادثة هنا

هترد بخاصية الثلج بأنه لا مثيل له تحفة.

- هي مش هتسمعك، هتسيبه وهتشوف غيره.

وكل مرة بتاخذ رأيك، وأنت يا مسكين بتقوله بغباء وجهل منك أنه رائع وذوقك خارق.. بس هي مش سامعك برضه.

نسيت أقولك سبب الفيزا في البيت

- هتشوف ألوان لم ترها من قبل، وكل المقاسات اللي في الدنيا، وهتخرج من المحل ده وهتدخل محل ثاني وثالث ورابع، وهتطلع الدور الخامس والسابع وهتنزل ثاني الرابع، وهتقولك ولا أقولك يلا نمشي.

أنتَ طبعاً الثلج ساح، والترمس خلص، وخذت كل أدويةك وبدأت تحس بأزمة قلبية، هتبدأ تلح بس، هتسمع مفردات حديثة لغوية على مسمعك، ما أنا عارفة كل ما أجي أشترى حاجة ليا يحصل كده، جات عليا أنا.

وهتسمع جدول العمل اليومي من سعة الشروق للغروب وإن
مصدقت أنزل أشتري وأنت مش عايز حتى تساعدني.

-نسيت أقولك سبب الفيزا في البيت، يا ترى فاكر؟!

أنت هتوصل لمرحلة هتفقد الشغف والسمع والبصر، وهتتعد في
مكان على جنب، وهتلف الدنيا بيك، وهتبدأ تفكّر وتحلّل وتحل
وتلخص بس مش هتوصل لحاجة.

بعد التسوق

- وبعد ساعات متعديش هتلاقيا داخلة عليك مبتسمة، وتقولك
أخيراً اشتريت، شفت لما سبتني لوحدي وقعدت اشتريت، إيه

رأيك؟ طبعاً أنت هتشوف الحاجة وأنت في حالة الغيبوبة دي،
هتبيدي إعجابك بها والحاجة اللي اشتريتها وأنها فعلاً مُحَقَّة.

- بس هي هتقولك كان نفسي أجيب عليها قطعة تانية

- أنت صريخك هيجيب أمن المول طبعاً، بس هتقولهم ترمس
القهوة وقع عليك.

بعد ما تروحوا البيت

المهم أول ما هتروحوا، هي هتجري تلبس الحاجة وتبص في المرآة
براحتها، وتقولك إيه رأيك، أنت ثابت على مبدئك أنه اختيار موفق
تحفة.

- هتبدأ تسمع طقطقة ونرفزة، وحد بيقول بس مش عاجبني، مش ده اللي كنت عايزه، ولا مقاسي ولا اللون.
- لازم أغيرّه، ما ده بسبب استعجالك ليا سبع ساعات وملحقتش أشتري، إيه يعني لما أجيب حاجة ليه.
- هروح أرجّعه خالص وأخذ الفلوس وأشوف محل غيره.

(نسيت أقولك سيب الفيذا في البيت برضه)



الخاتمة

خلصت الصفحات، بس الحكاية لسه شغالة؛

لأن "المفروس" مش أنا لوحدي، ده كل واحد فينا لما يحاول يفهم.

السخرية يا جماعة مش هزار، دي طريقة نعيش بيها وإحنا فاهمين اللعبة، ونحافظ على اللي فاضل من طاقتنا قبل ما البطارية الداخلية ماتفصل

لو وصلت لآخر الكتاب ولسه بتضحك، يبقى الرسالة وصلت، أن الكوميديا السوداء هي الهدف من البداية وليس الضحك من أجل الضحك فقط، مش مطلوب منك تكون حكيم، ولا حتى مفروس محترف، كفاية تكون بتضحك وأنت واعى، وإن ضحكت.. اضحك من القلب.



- حسام الدين محمد مدبولي
- "يوميات راجل مفروس".
- لما الضحك يبقى نوع من النجاة!

فهرس

- التعريف بالكاتب ٥
- مُقدمة الكتاب ٧
- (هرمون النكد، هل يتولد معنا ولا مُكتسب؟) ١١
- الحياة في الخطوبة حمادة وبعدها شاهيناز، لماذا لا تظل
حمادة؟ ١٥
- جروب الباييز ٣١
- الطبال والعصفورة ٣٩
- كيف تطفشي زوجك؟ ٤٥
- الرجلُ الغامض ٥١
- خناقة العيد وخناقة الإجازات، والفرق بينهما ٥٥

- ٦١ زيارة بطلاق
- ٦٧ عيد الجواز له معنى آخر
- ٦٩ قاموس الحياة الزوجية
- ٧٣ مُتعة سواقة السيدات
- ٧٩ أنا ضد النكد.. أنا ضد الكسر
- ٨٥ زوجتك تنتظرك في المنزل (لف وارجع ثاني)
- ٨٩ سيب الفيذا في البيت
- ٩٧ الخاتمة